

que hominum favor; sed infelix, annos tantum natus **XXXVI**. Neapolim Anno 1465. ad Ferdinandum Regem profectus, magnis nempe promissis illectus, ipsius Regis jussu, clam instigante Francisco Sforzia, carceri datus, & violenta morte, non sine Regii nominis infamia, de medio sublatus est.

Venio nunc ad Operis hujus Auctorem Porcellium. Mihi verisimile est, non *Porcellum*, ut habet MStus Codex, sed uti habent alii MSti *Porcellum*, seu *Porcellum* nuncupatum fuisse, cognomine ejus a porcis teneris olim deducto; quod is fortasse emollire nitus est, se *Porcellum* appellans. In ejus aetate designanda mire deceptus est eruditissimus vir Gerardus Johannes Vossius Lib. III. Cap. 3. de Hist. Latin. quem totis pedibus sequutus est Bailletus in Judic. Erudit. Tom. 3. pag. 15. Eum enim Petrarchae & Boccaccii aequalem statuit, hoc est circiter Annum 1370. floruisse tradit. Sed hic ipse Liber disputationi cuicunque locum eripit, apertissime ostendens, eumdem vixisse atque scripsisse Anno 1452. & ultra; quod & Vossius ipse animadvertere suopte ingenio potuisset, quando scriptis *Fridericum Urbinate Ducem Porcellio provinciam conscribendi sua gesta commendasse*: qui celeberrimus militarium copiarum Imperator ad Annum usque 1482. suam aetatem produxit. Fuit autem Porcellius patria Neapolitanus, Historiarum Scriptor, simulque Poëta, & quidem Laureatus pro more suorum temporum, quo facile per unam membranam Laureae Poëticae decus conferebatur. Verum Volaterrano, Gyraldo, aliisque aptis rerum Judicibus minime visus est Poëta magni faciendus; quae enim ab illo Carmina habemus (habemus autem Elegias atque Epigrammata) natura potius, quam industria ac meditatio, efformavit. At in Historia contexenda, ita me Deus amet, nemo illi contendat elegantiam sermonis, facilitatem atque facundiam, adeo ut quae nunc profero, omnino sperem vel morosis Lectoribus cum delectatione legenda. Quod superest, de Porcellio nostro, qui se Neapolitani Regis *Secretarium* appellat, agit Claris. Vir Apostolus Zenus in Additam. ad Vossium Tom. IX. pag. 148. Ephemer. Liter. Italiæ, atque ipso monente didicimus, adservari Veronae membranaceum Codicem MStum ejusdem Scriptoris cum hocce titulo: *Commentariorum secundi Annis de gestis Scipionis Picinini, exercitus Venetorum Imperatoris, in Hannibalem Sforciam Mediolanensem Ducem ad Serenissimum Principem Franciscum Foscari Venetorum Ducem per Claris. Historicum & Poëtam Laureatum Porcellium Neapolitanum*. Evidem hoc ipsum Opus, quod nunc produco, hisce verbis designari primo sum arbitratus. Verum accuratius haec perpendens, in eam sententiam descendi, foetum hunc ab altero esse plane diversum. Nempe Commentarii, quos nunc profero, Neapolitani Regi inscribuntur; illi vero Venetorum Duci. Heic suarum quidem copiarum ductor Jacobus Picininus in Veneto exercitu stipendia merebatur sub Gentile a Leonissa Imperatore; illi vero, sublato Gentile, Jacobus ipse universo exercitui praeerat. Uno verbo in nostris Commentariis gesta primo anno Belli referuntur; in iis acta anno subsequenti. Optandum ergo foret, ut & ii. Commentarii aliquando prodirent. Postremo tamdem loco Lectores monitos velim, in Bibliotheca Ducum Urbinate, cuius Catalogum habet Estensis, adservata olim fuisse *Porcellii Poëtae cultissimi* Opera quatuor voluminibus comprehensa. Ea vero in Vaticanam Bibliothecam inventa cum ceteris Urbinatis MStis credere par est.